



KEMENTERIAN PERPADUAN NEGARA

TEKS UCAPAN

**YB DATUK AARON AGO DAGANG
MENTERI PERPADUAN NEGARA**

SEMPENA

**MAJLIS MAKAN MALAM ALUMNI – SIRIH PULANG KE
GAGANG
HOMECOMING ALUMNI XIII
UNIVERSITI PUTRA MALAYSIA**

**22 NOVEMBER 2025
GRAND MARGHERITA HOTEL, KUCHING SARAWAK**

Salam sejahtera dan Salam Malaysia Madani.

SALUTASI

*(*salutasi akan disediakan secara berasingan)*

PENGENALAN

1. Pertama sekali, saya merakamkan setinggi-tinggi penghargaan kepada pihak penganjur kerana menjemput saya untuk bersama dalam **Majlis Makan Malam Alumni UPM Sirih Pulang ke Gagang@Homecoming XIII** ini.
2. Malam ini kita **menghimpunkan alumni daripada UPM Serdang dan UPM Sarawak**, daripada pelbagai fakulti, pelbagai bidang, dan pelbagai generasi alumni 70-an, 80-an, 90-an, sehinggalah kepada generasi profesional muda. Daripada bidang pertanian, perhutanan, ekonomi, kejuruteraan, sains komputer, sains makanan, pengurusan, pendidikan dan banyak lagi; kita bersatu sebagai satu keluarga besar UPM satu alma mater, satu perjuangan ilmu, satu warisan kecemerlangan.
3. Di **Universiti Putra Malaysia**, saya menjejakkan kaki sebagai **pelajar Fakulti Perhutanan** pada tahun **1979**, dan **menamatkan pengajian pada 1983**. Saya tinggal di **Kolej**

Kediaman Kedua, yang pada waktu itu menjadi rumah kedua saya selama empat tahun penuh dengan suka, duka dan tawa.

4. Selepas menamatkan pengajian di sini, perjalanan hidup saya terus dipandu oleh nilai-nilai yang saya pelajari di UPM. Pada **tahun 2004, saya diberi kepercayaan oleh rakyat untuk menjadi Ahli Parlimen Kanowit sehingga kini**. Kemudian, pada **tahun 2020, saya dilantik sebagai Timbalan Menteri Kesihatan**, dan pada **penghujung tahun 2022, saya diamanahkan untuk memikul tanggungjawab sebagai Menteri Perpaduan Negara**.
5. Saya percaya, semua pencapaian ini bermula di sini, di bumi UPM. UPM bukan sekadar tempat saya menuntut ilmu, tetapi tempat saya belajar tentang kehidupan, tanggungjawab dan kepimpinan. **Di sinilah saya mengenal erti disiplin, kerja keras, dan semangat untuk berkhidmat kepada rakyat dan negara**.
6. Malam ini saya melihat wajah-wajah yang telah berjaya dalam pelbagai lapangan. Ada yang menjadi ahli akademik, pensyarah, saintis, jurutera, pegawai tinggi kerajaan, usahawan, CEO dan pemimpin komuniti. **Di mana sahaja kita berada, kita**

membawa nama almamater kita, Universiti Putra Malaysia. Inilah kekuatan UPM, bukan sekadar menghasilkan graduan, tetapi melahirkan insan yang menyumbang kepada negara dan masyarakat.

PENCAPAIAN UPM

Hadirin yang saya hormati sekalian,

7. Saya juga dimaklumkan bahawa Universiti Putra Malaysia terus mengukuhkan reputasinya sebagai institusi terkemuka di rantau ini dengan pencapaian yang dibuktikan melalui pelbagai penarafan dan pengiktirafan rasmi. Terkini, **UPM berada dalam kelompok *Top 20 Asia* apabila disenaraikan di kedudukan ke-20 dalam QS World University Rankings: Asia 2025.**
8. Dalam bidang kelestarian, **UPM turut menerima pengiktirafan serantau apabila inisiatif tenaga boleh baharu kampus memenangi 1st Runner-Up ASEAN Energy Awards 2025 di bawah kategori Tenaga Boleh Baharu.**
9. UPM juga terus menunjukkan kekuatan dalam kebolehpasaran graduan serta pencapaian global berasaskan data yang sahih. **Universiti kita diiktiraf sebagai antara institusi pilihan**

majikan apabila menerima Employers' Choice Award 2025 oleh Talentbank, sekaligus membuktikan graduan UPM relevan, berketerampilan dan diyakini industri. Keseluruhannya, pencapaian-pencapaian ini menjadi asas kukuh yang membuktikan bahawa UPM bukan sekadar institusi pengajian tinggi, tetapi sebuah universiti berimpak global yang terus melahirkan graduan berdaya saing serta penyelidikan yang memberi manfaat kepada negara dan dunia.

10. Tahniah buat pengurusan tertinggi dan mahasiswa UPM!

11. Baru-baru ini juga, **UPM Kampus Bintulu Sarawak dijenamakan semula sebagai UPM Sarawak pada 30 Jun 2025.** Kampus ini telah wujud di Sarawak sejak tahun 1974 - sebuah institusi yang kini berusia 50 tahun. Daripada sebuah kampus dengan kemudahan asas yang sederhana di Semenggok, UPM Sarawak yang kini terletak di Bintulu Sarawak berkembang menjadi gedung ilmu penting dalam bidang pertanian moden, sains, biodiversiti, perhutanan, akuakultur dan pelbagai bidang strategik lain yang seiring dengan agenda pembangunan negeri dan negara.

12. UPM Sarawak kini memainkan peranan penting sebagai pusat rujukan akademia Borneo, pusat penyelidikan biodiversiti tropika, hab pembangunan komuniti dan rakan strategik utama Sarawak dalam agenda keterjaminan makanan. Saya pasti **Kerajaan Sarawak pimpinan YAB Datuk Patinggi Tan Sri (Dr) Abang Haji Abdul Rahman Zohari Bin Tun Datuk Abang Haji Openg, Premier Sarawak akan terus menyokong pembangunan kecemerlangan UPM Sarawak.**

PERANAN ALUMNI-ALUMNI UNIVERSITI DI NEGARA

Hadirin yang saya kasihi sekalian,

13. **Alumni merupakan aset strategik kepada sebuah universiti dan negara kerana mereka membawa identiti, nilai, dan reputasi institusi ke peringkat masyarakat, industri dan dunia.** Alumni yang berjaya bukan sekadar mewakili kejayaan individu, tetapi melambangkan keberkesanan ekosistem pendidikan negara dari kualiti pengajaran, penyelidikan, pembangunan sahsiah hingga ke peluang pekerjaan dan jaringan industri. Mereka menjadi jambatan antara universiti, dunia pekerjaan dan komuniti, serta memperkukuh keyakinan masyarakat terhadap institusi pendidikan tinggi.

14. Dalam era MADANI yang menekankan keterlibatan dan pengupayaan rakyat, alumni berperanan sebagai ejen perubahan yang menyumbang kepada universiti melalui pelbagai bentuk termasuk pemindahan ilmu, penglibatan industri, mentorship kepada pelajar, penajaan biasiswa, penyediaan latihan industri, peluang pekerjaan, serta sokongan kewangan melalui endowment dan dana pembangunan. Alumni juga membantu universiti memperkukuh ekosistem inovasi melalui kerjasama penyelidikan, pembangunan teknologi dan hubungan antarabangsa. Kejayaan alumni dapat meningkatkan kedudukan global universiti, mempengaruhi ranking, dan menarik minat pelajar antarabangsa.

15. Contohnya, **Universiti Harvard dan MIT banyak menerima dana penyelidikan dan endowment daripada alumni berprofil tinggi mereka; Oxford dan Cambridge pula membina reputasi global melalui pengaruh alumni dalam kepimpinan dunia, industri dan akademik. Di Asia pula, National University of Singapore (NUS) dan Tsinghua University melonjak sebagai universiti bertaraf dunia sebahagian besarnya kerana kekuatan jaringan alumni yang menyokong inovasi dan membuka akses pasaran global. Kesemua contoh ini**

membuktikan bahawa alumni adalah tulang belakang kepada kecemerlangan sesebuah universiti.

PENUTUP

Hadirin yang saya muliakan sekalian,

16. Akhir kata, saya ingin mengucapkan setinggi-tinggi syabas dan tahniah kepada jawatankuasa penganjur atas usaha menjayakan majlis yang sangat bermakna pada malam ini. Semoga hubungan antara alumni dan almamater akan terus diperkukuh, dan semoga UPM terus gemilang di persada negara dan dunia.

17. Dengan ini, saya merasmikan **MAJLIS MAKAN MALAM ALUMNI – SIRIH PULANG KE GAGANG, HOMECOMING ALUMNI XIII UNIVERSITI PUTRA MALAYSIA.**

Sekian, Terima kasih.